

di dalam soal yang demikian ini? Jawapannya terpulang kepada bangsa Melayu sendiri. Kita hanya wajib mengingatkan bahawa di dalam masa orang-orang Melayu berpecah-pecah aliran politiknya dan dilaga-lagakan oleh pemimpin-pemimpin Melayu sendiri umpamanya perselisihan UMNO dengan PAS orang lain bersorak dan kita orang Melayu tidak menyedari bahawa di dalam kita bercakar-cakaran, di rumah kita dipenuhi orang lain dan berkongsi dengan orang lain dan akhirnya kita tidak punya rumah sendiri lagi tetapi rumah bersama-sama.

* * *

Pil Menjarangkan Beranak dan Akibat-akibatnya

Di dalam persidangan Parlimen baru-baru ini di Malaysia, Dr. Mahathir telah menarik perhatian kerajaan supaya mengadakan peraturan-peraturan tentang jualan pil-pil menahan beranak kerana pil-pil yang dijual itu adalah dijual dengan terbuka kepada umum dan tiap-tiap orang boleh membelinya dan yang demikian ini tentunya membawa akibat-akibat yang tidak baik – orang-orang yang tidak semestinya menggunakan pil itu, telah berpeluang menbelinya dan menggunakan pil itu untuk keperluannya sendiri.

Apa yang dikatakan oleh Dr Mahathir itu memang benar, apa lagi kalau kita perhatikan di dalam kempen-kempen mengadakan sukatan beranak yang berjalan di Tanah Melayu ini, sama ada di Singapura atau di Malaysia, adalah didebak kepada umum sehingga kalau kita perhatikan di tempat-tempat itu yang

banyak melihat, memerhati dan mempelajarinya bukannya keluarga-keluarga yang sudah berkeluarga tetapi anak-anak sekolah, yang baru meningkat ke umur belasan tahun, yang baru meningkat gadis, telah mengetahui cara-cara bagaimana menahan beranak.

Sekali imbas yang demikian ini tentunya tidaknya mengapa, kerana ia menjadi suatu pengajaran yang bakal digunakannya apabila ia dewasa nanti, apabila mereka berumah tangga nanti, tetapi pada segi moral, di dalam keadaan masyarakat di sekeliling kita hari ini yang demikian itu sangat merbahaya. Ini dalam.¹ pandangan segi moral umum, apa lagi kalau kita pandang dari segi moral agama, terutamanya agama Islam, maka akibat-akibat yang akan terbit daripada yang demikian ini, kita boleh memandang, menurut pandangan kita, bahawa ajaran-ajaran yang sedemikian itu bakal menghidupkan “pelacur yang kehormat” kerana wanita-wanita, terutamanya gadis-gadis, dengan mudah akan menurutkan hawa nafsunya dengan mengetahui bahawa mereka akan terjauh daripada akibat-akibat yang akan memburukkan nama keluarganya yaitu daripada melahirkan anak. Daripada segi moral inilah yang menjadikan apa yang dikatakan oleh Dr Mahathir bahawa penjualan pil-pil menahan beranak yang tersebut dengan seberapa segera mestilah diadakan kawalan dan pembeliannya tidaklah boleh dijual begitu sahaja melainkan ada mendapat kelulusan daripada doktor-doktor, ertinya boleh dibeli dengan surat-surat doktor-doktor khas sama seperti suatu barang yang ditegah jualannya kepada umum.

Dengan cara-cara yang semacam ini

maka umum, termasuk semua orang, akan terkawal daripada berleluasa menggunakan pil-pil itu yang dengan kerananya terjauhlah daripada orang-orang yang tidak mesti menggunakan pil itu terjauh daripada akibat-akibat yang tersebut dan yang demikian akan menghalang mereka daripada bencana-bencana merosotnya moral dan bencana-bencana menjadi “pelacuran yang kehormat” yaitu pelacuran yang mengambil kesukaan-kesukaannya, berzina dengan lelaki suka sama suka dengan mengetahui bahawa ada ubat yang bakal menjauhkan daripada bencana menimbulkan benih. Ini tentunya bukanlah tujuan kerajaan di dalam pelaksanaan ini untuk itu tetapi tujuan kerajaan tentunya lain daripada itu.

Terlanjur mempersoalkan persoalan mengenai sekatan beranak, kita sangat berduka cita memerhatikan, terutamanya atas kerajaan Malaysia yang agama rasminya agama Islam, didalam soal mengenai dengan menggalakkan sukatan beranak, hanya cuba berpandu kepada apa yang dibuat oleh negara-negara yang dikatakan “Negara Islam” seperti Mesir dan seumpamanya di dalam mengharuskan mengadakan sukatan beranak.

Kerajaan seolah-olah berqiblat kepada orang-orang Mesir pada hal pemerintahan Mesir itu adalah sebuah pemerintahan *Socialist* – bukan perintahan agama Islam. Untuk mencari penjelasan kepada perkara-perkara agama yang boleh mengharuskan atau pun menegah di dalam perkara mengadakan sukatan beranak, maka kerajaan Malaysia sepatutnya mengadakan suatu langkah mencari pendapat-pendapat ulama-ulama di seluruh Malaysia ini – kerana tidak kurang di dalam

¹ Tanda noktah yang tidak sepatutnya ada. Mungkin asalnya adalah tanda koma.